

'Udechoo 'Udustl'us John 'Uk'e Yánguz-i

Ndi khuni be ts'úkhuna-i, 'i ghun

1 ¹ Soo 'udechoo da' whuts'un hoonli-un soo ts'ih'un un'a whuzdánt's'o-un, nena be cha ts'onalh'en, 'ink'ez nela be cha oot'á ts'aznai khuni be ts'úkhuna-i, 'i ghun.

² Ndi be ts'ukhuna-i nenalhts'et halts'ut 'ink'ez ts'ohon'en 'ink'ez howu yats'alhduk. Ndi 'ilhiz be ts'ukhuna-i neBá bulh 'unt'oh. 'I nenalhts'et ha hóolts'ut, 'et huwun nohts'udáni'.

³ Ndet ts'ohon'en-un 'ink'ez ts'odánt's'o-un, 'et huwun nohts'útni. 'Et la lhulh 'uts'int'oh ts'oole'. 'Et 'alha' neBá 'ink'ez ooYe' Sizi Gri bubulh 'ilhoh uzdidowh.

⁴ 'Ink'ez ndi ts'iyawh huwun nohts'ó k'e' ts'anguz, 'et sih tube cho whunólhni.

Ndi be hoot'en-i, 'i ooniz ts'idulh de,
'et de 'ilhoh 'uts'int'ohne tsinli

⁵ Ndi khuni ts'odánt's'o-un 'i 'unt'oh, 'en ts'aháalts'ut-i, 'i ghun nohts'útni Yak'usda be hóot'en-i 'unt'oh, 'ink'ez 'aw tsálhgus ooghu hooloh gaih.

⁶ 'En bulh lhulh 'úts'int'oh ts'utni de, 'ink'ez tsálhgus yo ts'e ts'idulh de, 'et ts'uwhuts'it whe' ts'utni, 'ink'ez 'aw khuni 'alha' 'unt'oh-i ook'u nulhe'ts'ust'en.

⁷ 'Et hoont's'i be hoot'en-i bulh 'unt'oh, 'i ooniz ts'idulh de, 'et de 'ilhoh lhulh 'uts'int'ohne tsinli 'ink'ez ooYe' Sizi Gri buzkai' be nelubeshi ts'iyawh yuna'alhde.

⁸ 'Aw lubeshi lhts'it'ih ts'utni de, na'uzdunut'ah 'ink'ez khuni 'alha' 'unt'oh-i neghu hooloh.

⁹ Lubeshi 'uts'alh'en ts'utni de, 'aw nelalhdutisni 'ink'ez ts'ih'un 'unt'oh whe nelubeshi neba yunaoodutilnoh 'ink'ez tank'us un'a 'uhoont'oh-un, ts'iyawh whuch'a neyuna'tilhdoh.

¹⁰ 'Aw lubeshi lhe'ts'ílel ts'utni de, Yak'usda whuts'it-un 'unt'oh ts'utni whe' ts'utni, 'ink'ez ooghuni, 'aw neghu hooloh.

2¹ Suzkehkeyaz, lubeshi 'utilh'elh which'a 'et ndi khuni 'i be nohts'ó k'e' usges. Mbene lubeshi 'ulh'enne, 'enne buba neBá Yak'usda but neba yatilhduk-un, Sizi Gri, ts'ih'un un'a 'unt'oh-un, 'en 'unt'oh.
² 'Ink'ez 'en 'unt'oh nelubeshi k'elha dazsai. 'Aw wheni za iloh. Yinka ndulcho whe whulubeshi k'elha cha. 'I be la neBá soo cho nets'u naítot'en 'et hukwa.

Sizi Gri mbe unli, whuz un'a t'ezninzun

³ Khuni netl'a idan'ai-i ook'une' ts'ut'en de, 'et whuz un'a t'ets'onínzun 'i gha Sizi Gri t'ezninzun.

⁴ Dune 'utni, “‘En t'enuszun,” ni de, 'ink'ez yughuni yuk'unulhe'ust'en de, 'en whuts'it-un 'unt'oh 'ink'ez ndi khuni 'alha' 'unt'oh-i 'aw lhiyít'ih whe 'unt'oh.

⁵ 'Et ndan yughuni k'une' 'ut'en-un, 'en 'alha' Yak'usda ye nék'ensi-i be ts'ih'un un'a lhadúlya whe 'unt'oh. 'Et whe t'ets'onínzun Sizi Gri ooyúzdults'i whe' ts'int'oh.

⁶ Mbe la ye yudínda-un ni de, nts'en'a la nusuya-un, 'et whuz un'a za nóya' huba' hoont'oh.

⁷ Sulhutsinke^a 'aw khuni 'andidi-i netl'a idan'ai-i, 'i ghu iloh nohts'ó k'e' usges. 'Udechoo whuts'un t'enahzun ndi khuni 'uda'-i 'unt'oh. Ndi khuni 'uda'-i, 'udechoo whuts'un dahts'o-i, 'i 'unt'oh.

⁸ Tsálhgus yo 'awet whedúdeh 'ink'ez ts'ih'un be hóot'en-i 'awet be hóot'en sulí'. 'Et huwa nohts'ó k'e' usges 'ink'ez doo cha 'unohdúsní, 'andit khuni netl'a ídan'ai-i, 'i ndi 'alha' khuni 'i yulh 'únt'oh, 'ink'ez nohni cha bulh 'áht'oh.

⁹ Dune 'utni, be hóot'en niz 'unt'oh ni de, 'ink'ez dulhutsin ts'u dutni, 'en 'awhuz tsálhgus yo usda whé 'unt'oh.

¹⁰ Mbe dudulhutsin k'e ntsi'-un, 'en be hóot'en toh 'unt'oh 'ink'ez 'aw tank'us 'utit'elh-un whuts'u nólht'i ait'oh.

¹¹ 'Et hoonts'i ndun dudulhutsin ts'u dutni-un, 'en tsálhgus yo 'unt'oh 'ink'ez tsálhgus yo nuya. 'Ink'ez nts'e tizya-un 'aw t'oonúszun, ndi tsahólhgus-i be hoos'en sulí' 'et huwa.

Yak'usda ba ulhtusne huzdli'

¹² Ts'oodunneyaz Sizi Gri boozí' gha noh lubeshi nohba buna'ide, 'et huwa nohts'ó k'e' usges.

^a2:7 Ndi khuni, “Sulhutsinke,” mbene la Sizi Gri ooba 'alha' yint'ohne, 'enne 'ants'i lhuzkehke hinli le' hint'oh. 'Et huwa lhulhutsin 'ink'ez lhulhtuske hinli whe' hint'oh.

13 Nebáke ndult'ohne ndun mbe 'udechoo whuts'un hoonli-un,
'en t'enhazun, 'et huwa nohts'ó k'e' usges.

Chilke ntsi'-un ooch'a' nulhde 'et huwa nohts'ó k'e' usges.

Ts'oodunne neBá t'enhazun,
'et huwa nohts'ó k'e' usges.

14 Nebáke mbe 'udechoo whuts'un 'unt'oh-un t'enhazun, 'et huwa
nohts'ó k'e' 'isguz.

Chilke ulhtus 'ink'ez Yak'usda ooghuni nohyudín'ai,
'ink'ez ntsi'-un ooch'a' nulhde,
'et huwa nohts'ó k'e' 'isguz.

Ndiz un'a ndi yun k'ut 'uzdólti'

15 Ndi yun k'ut tank'us 'uwhut'en-un 'ink'ez ndi yun k'ut hoonli,
'i cha, whuts'u nóoh't'i junih. Mbe la ndi yun k'ut tank'us ne'whut'en
ndóohoont'oh-un whuts'u nint'i de, 'aw neBá ye nék'ensi'-i ooghu whe
yooloh whe 'unt'oh.

16 Neyust'e whuts'ú nint'i-un, 'ink'ez nena whuts'u nint'i-un cha,
'ink'ez ndai la aht'i-un be 'ududulhti' de, 'owhi ts'iyawh ndi yun
k'ut huba 'unt'oh, 'ink'ez 'aw neBá ts'u ha lhúhoolts'ut 'et huwa.

17 Ndi yun 'awet whewhúlt's'it 'ink'ez oots'úznint'i-i cha, 'et hoonts'i
Yak'usda hukwa' ninzun te ne'út'en-un, 'en 'ilhiz khutinalh.

Mbene la Gri ch'az ditnine, 'enne buch'a khóhde'

18 Suzkehne 'awet 'et né'hunint'o whe' hoont'oh. Gri ch'az ditni-un
whuz de úyalh whulh 'údahts'o whe' hoont'oh. 'Andit hoonts'i Gri
ch'az ditnine huldlai whe' hoont'oh. 'Et whe t'ets'onínzun 'awet 'et
né'hunint'o whe' hoont'óh.

19 Nets'u ha hándil whe' hint'oh 'et hoonts'i 'aw nebulh didowhne iloh
'uhint'oh. Nebulh didowhne 'uhint'oh de, nebulh za da 'uhoot'e' oole'.
'Et hoonts'i whehandil 'et huwa la ts'iyanne t'ebunózin 'aw nebulh
didowhne luhíloh.

20 'Et hoonts'i ndun Gri lubeshi ooghu hooloh-un, 'en Ndoni
nohyídan'ai 'ink'ez ts'iyaintsuk t'eoonáhzun.

21 Ndi khuni 'alha' 'unt'oh-i t'enuzahzun huwa iloh nohts'ó k'e' 'isguz.
Ndi khuni t'enhazun 'et huwa nohts'ó k'e' 'isguz 'ink'ez ndi khuni 'alha'
'unt'oh-i whuts'it ooghu hooloh.

22 Mbe Sizi 'en Gri unli 'et whuts'oodidlai-un, 'en whuts'it-un 'unt'oh. 'En
Gri ch'az ditni-un 'unt'oh. 'En 'unt'oh neBá 'ink'ez ooYe' bulh but's'oodidlai.

23 Mbe la neBá ooYe' ts'oodidlai-un, neBá cha lhiyít'ih whe 'unt'oh.
Mbe neBá ooYe' ooba 'alha' yint'oh de, ooBá cha yut'i whe 'unt'oh.

'Udechoo whuts'un whudáhts'o-un 'ilhiz wheni bulh óoht'e'

24 'Et huwa 'udechoo whuts'un whudáhts'o-un 'ilhiz wheni 'óohtun. 'Et 'udechoo whuts'un whudáhts'o-un nohbulh 'úhoont'oh de, 'et sih neBá 'ink'ez ooYe' cha bubulh 'útiht'elh.

25 Njan nets'ú hoozi-un, 'ilhiz ts'ukhutinah-un, 'et 'uwhúlhni.

26 Mbene la nanohunti'ah hukwa' 'ut'enne, 'enne bughun ndi nohts'ó k'e 'isguz.

27 'Ink'ez Ndoni neBá nohyeídan'ai-i, 'ilhiz nohbulh 'únt'oh, 'ink'ez 'uyoonne dune 'aw 'on 'un whunohodoolh'eh huba lhe'hóot'oh. 'Et k'us ndi nohyudílt's'ut-i ts'iyantsuk whunohdulh'eh 'ink'ez ts'ih'un 'unt'oh, 'aw whuts'it-i iloh 'unt'oh. 'Et soo nts'en'a la whunohdalh'e', whuz un'a za bulh óoht'e'.

**Wheni Yak'usda oodune'ne,
'aw hoonli hukwaya lhts'iloh whe la oobut núzdolya'**

28 Suzkehkeyaz ndun 'en za bulh óoht'e'. 'Et whe la nohnalhts'et hainya de, 'ink'ez whusanája de, nedzi ulhtus unli 'ink'ez 'aw hoonli hukwaya lhts'iloh whe la oobut núzdolya'.

29 'En ts'ih'un un'a 'unt'oh t'eeonáhzun de, t'eeonahzun mbene la ts'ih'un ne'út'enne 'enne Yak'usda yé ulhtus-i be huwhuzdli whe' hint'oh.

3 ¹ Dalcho-i be neBá nek'entsi-un negha óonin'ai, Yak'usda dich'oh 'uneúlhni buzkeh 'uts'int'oh soo cho whunulh'en. 'Et huwa ndi yun k'ut whut'enne t'enehunúszun, didut 'aw t'ehinúszun 'et huwa.

² Ook'esi'ne 'andit Yak'usda buzkeh tsinli. Daztit'elh-un 'awhuz nenalhts'et ha lhúwhulhts'it. 'Et hoontsi' t'ets'oninzun ts'an'en de, soo bunduz tilt'elh, soo nts'en'a la dant'oh, whuz un'a 'uztilh'elh 'et huwa.

³ 'Ink'ez mbene whuz un'a hits'un hukwa tse hooline, dutsun hooloh na'hudutiltselh, dant'oh la ootsun hooloh, whuz un'a.

Lubeshi 'uts'ulh'en-un ts'iyawh whulazdootnih huba' hoont'oh

⁴ Mbe lubeshi 'ulh'en, 'aw Yak'usda ooghuni yuk'ú nulhe'ust'en-un whe 'unt'oh. 'Et khuni k'uts'uyus de, lubeshi 'uhoont'oh.

⁵ 'Ink'ez t'eeonáhzun nelubeshi neba 'ún yutoolhdilh ha ndi yun k'ut nusuya. 'Ink'ez didut 'aw lubeshi ooghu hooloh whe 'unt'oh.

⁶ Mbe ye yudinda-un, 'aw lubeshi oolh'en ait'oh whe 'unt'oh. Mbe lubeshi 'ulh'en-un, 'aw lhuyí'el 'ink'ez 'aw t'einúszun.

⁷ Ts'oodunneyaz 'uyoon nanohnoo'ah junih. Mbe la ts'ih'un ne'ut'en-un, 'en ts'ih'un 'unt'oh. Dant'oh la Sizi Gri ts'ih'un 'unt'oh, whuz un'a ndunt'oh whé 'unt'oh.

⁸ 'Udechoo whuts'un netsudule lubeshi 'ulh'en. Mbe lubeshi 'ulh'en, 'en netsudule uniyalh-un 'únt'oh. Njan 'et huwa Yak'usda ooYe' ndi yun k'ut nusúya whe netsudule be 'ut'en musai yoolhtselh ha.

⁹ K'us mbe Yak'usda yé ulhtus-i bé whuzdli-un, 'en lubeshi lhe'ulh'en. Ndi Yak'usda ts'u hainzut-i, 'i be 'ilhiz wheni ts'ukhutinalh, 'ink'ez 'ilhiz wheni yulh 'unt'oh. 'Et mbene 'i be whuzdline, 'enne 'aw lubeshi 'uhoolh'en ait'oh.

Wheni Sizi Gri unidulhne ts'iyawh lhk'e ts'ootsi'

¹⁰ 'Et ndiz un'a Yak'usda buzkeh 'ink'ez netsudule buzkeh cha t'ehunudzun: Mbe la ts'ih'un nulhe'ust'en, k'us dudulhutsin k'elhítsi', 'en Yak'usda uniyalh-un iloh whe 'unt'oh.

¹¹ Soo 'udechoo whe' whudit'en whuts'un ndi khuni dahts'o njan ndutni, lhk'e ts'ootsi', ni.

¹² Ndun Cain 'en k'un'a iloh. 'En ndun ntsi'-un uniyalh-un inle' 'ink'ez dudulhutsin yuzilghgi. Ndet hukwa yinla yuzilghgi? Be 'ut'en untsi' 'ink'ez bulhutsin 'en ts'ih'un ne'ut'en, 'et hukwa' yinla.

¹³ Sulhutsinke ndi yun k'ut whut'enne nohts'o dutni de, khun te nohba hócha junih.

¹⁴ Neulhutsinke buk'ets'intsi', 'et huwa t'ets'oninzun dats'uzsai le' ts'int'oh 'ink'ez nats'ukhítina' ts'int'oh. Mbe dulhutsin k'elhítsi'-un, 'awhuz dazsai le' 'unt'oh.

¹⁵ Mbe dulhutsin ts'u dutni-un, 'en neghan-un 'unt'oh. 'Ink'ez t'eeonáhzun mbe neghan-un, 'en 'ilhiz be ts'ukhuna-i ooghu whe yooloh whe 'unt'oh.

Sizi Gri neba daja la 'et huwa be lhk'e ts'utsi'-i t'ezninzun

¹⁶ Sizi Gri 'en ye khuna-i neba yula ditni, 'et huwa be lhk'e ts'utsi'-i t'ezninzun. 'Ink'ez wheni cha neulhutsinke be ts'úkhuna-i buba oolazdootnih huba' hoont'oh.

¹⁷ 'Et hoontsi' mbe ndi yun k'ut hoonli 'ut'i-un whe bulhutsin 'e'dunidzit de, 'ink'ez dudzi be 'aw yugha telhe'nizil de, nts'en'a Yak'usda ye nék'ensi'-i yulh 'útit'elh? 'Et dut'en de, nts'en'a Yak'usda k'e titsi'?

¹⁸ Ts'oodunneyaz 'aw khuni be za lhk'e ts'ootsi' uzdoon!. Soo ts'ih'un un'a ne-e'ut'en be cha lhk'e ts'ootsi'.

¹⁹ Njan 'et huwa t'ets'oninzun khuni 'alha' 'unt'oh-i bulh 'uts'int'oh. 'Et la oobut nedzi ts'ih'un oot'e!.

²⁰ Nedzi gha neba nahisda de, Yak'usda 'on nus negha te'ninzun whe 'unt'oh, ts'iyantsuk t'eeonínzun 'et huwa.

21 Ook'esi'ne nedzi neba nalhuhusye de, whélhts'uniljut whe Yak'usda oobut núzdilhya.

22 Di oots'o óoka' ts'utni-i, 'i negha íyunle, ooghuni ts'oontun 'ink'ez hoonzoo whe oonalh ne'ts'ut'en 'et huwa.

23 Ndi dughuni netl'a ídan'ai, ooYe' Sizi Gri mbe unli neba 'alha' oot'e' 'ink'ez lhk'e ts'ootsi'. 'Et whuz un'a dughuni netl'a ídan'ai.

**Soo cho huwohle' lhane whe nus hoo'enne
na'hududil'i 'uda' netoh 'uhut'en whe' hoont'oh**

24 Mbe yughuni oontun-un, 'en Yak'usda yudínda 'ink'ez Yak'usda yulh 'unt'oh. Ndoni neyídan'ai 'en be t'ets'onínzun neyo ts'e nebulh 'unt'oh.

4 1 Ook'esi'ne, nudúdeh-i ts'iyawh iloh nohba 'alha' oot'e' junih.

Ndi nududeh-i oozúlhdzih Yak'usda ba ts'ih'un 'unt'oh tilah. Lhane huwhuts'it whe nus húhoo'enne yun k'e hindil 'et huwa.

2 Ndai nududeh-i Sizi Gri duyust'e be ndi yun k'ut nuseya, ni de, 'i Yak'usda ba ts'ih'un whe 'unt'oh. 'Et whe Yak'usda ooyughi mbe unli t'enoohzin.

3 Ts'iyai nududeh-i Sizi Gri duyust'e be ndi yun k'ut nuseya, 'aw lhdsunih de, 'aw Yak'usda bulh lhé'it'oh whe 'unt'oh.

Ndi nududeh-i, 'i Gri ch'az ditni-i, 'i 'unt'oh. Whusatiyalh whulh 'údahts'o 'ink'ez 'uda' ndi yun k'ut hoonli whe 'unt'oh.

4 Ts'oodunneyaz Yak'usda ooch'e' 'ahli 'ink'ez ndunne Gri ch'az ditnine 'uda' buch'a' nulhde. Nududeh-i nohyudinda-un, 'en ndi yun k'ut 'unt'oh-un netsudule 'en 'unt'oh, yanus 'ultus whe 'unt'oh 'et huwa.

5 Ndunt'ohne ndi yun k'ut whuch'e' hinli. 'Et huwa yun k'ut whut'enne buk'un'a yahalhduk 'ink'ez yun k'ut whut'enne buboohoozilhts'ai.

6 Wheni Yak'usda ooch'e'ne tsinli. Mbene la Yak'usda t'eninzunne, 'enne nehudits'o. Mbene la Yak'usda ooch'e' lhilohne, 'enne 'aw lhunehoozilhts'ai. 'Et huwa njan nududeh-i ts'ih'un 'unt'oh-i 'ink'ez tank'us 'unt'oh-i nudúdeh-i t'ebuznínzun.

**Ts'iyanne lhk'etsi'ne, 'enne Yak'usda yé ulhtus-i
bé huwhuzdli 'ink'ez Yak'usda t'ehinínzun**

7 Ook'esi'ne ts'iyawh lhk'e ts'ootsi'. Bé lhk'e ts'utsi'-i Yak'usda ts'u hált's'ut whe 'unt'oh. Ts'iyanne lhk'etsi'ne, 'enne Yak'usda yé ulhtus-i bé huwhuzdli 'ink'ez Yak'usda t'ehinínzun.

8 Ndun dulh dune k'elhítsi'-un, Yak'usda t'enuszun whe 'unt'oh, Yak'usda 'en nek'entsi'-un 'unt'oh 'et huwa.

9 'Aw 'ílhoghun duYe' 'en ndi yun k'uz yútilh'a'. 'En be 'ilhiz wheni ts'ukhoona' ha. 'Et whuz un'a Yak'usda ye nék'ensi'-i yunénilhtan.

10 Njan nduwhutni, wheni Yak'usda ook'elhts'ítsi' inle', 'et hoontsi' nek'entsi' 'ink'ez duYe' whusayálh'a' nelubeshi k'elha datitsa ha. 'I be soo cho nets'u naítat'en.

11 Ook'esi'ne, 'et whuz un'a Yak'usda nek'entsi' de, wheni cha lhk'e ts'ootsi' huba' hoont'oh.

Lhk'e ts'utsi' de, Yak'usda neyudinda

12 'Aw dune Yak'usda yan'enne hooloh. Lhk'e ts'utsi' de, Yak'usda neyudinda 'ink'ez ye nék'ensi'-i nedzi yo soo ts'ih'un un'a lhadulya.

13 Njan 'et huwa t'ets'oninzun Ndoni negha ínin'ai 'et whe Yak'usda bulh 'uts'int'oh 'ink'ez didut cha neyudinda.

14 Ndi yun k'ut whut'enne bubutilhyis-un ha neBá duYe' whusayálh'a'. 'Et ts'ohon'en 'ink'ez howu yats'ulhduk.

15 Mbe Sizi Yak'usda ooYe' 'unt'oh ni-un, 'en Yak'usda yuyudinda 'ink'ez didut cha Yak'usda bulh 'unt'oh whé 'unt'oh.

16 Yak'usda ye nék'ensi'-i t'eznanzin 'ink'ez neba 'alha 'uhoont'oh. Yak'usda nek'entsi'-un 'unt'oh. Mbe bé lhk'e ts'utsi'-i bulh 'únt'oh-un, 'en Yak'usda bulh 'unt'oh 'ink'ez Yak'usda yuyudinda whe 'unt'oh.

Ndiz un'a be lhk'e ts'utsi'-i soo ts'ih'un un'a neba lhadúlya suli'

17 Neba nahudeh dzin 'et sih nedzi oolhtus ha, 'et whuz un'a be lhk'e ts'utsi'-i soo ts'ih'un un'a neba lhadúlya suli'. Gri 'et ndunt'oh huwa, wheni cha ndi yun k'ut 'et nduts'ínt'oh 'et huwa.

18 Bé lhk'e ts'utsi'-i 'aw nujut ooghu hooloh. 'Et hoontsi' bé lhk'e ts'utsi' soo ts'ih'un un'a lhadúlya suli'-i, 'i nujut 'un whenaínuyukw. Nujut dzoh nunéulhdzut whe 'unt'oh. Mbe la nuljut-un, 'en bé lhk'e ts'utsi'-i ooyo soo ts'ih'un un'a lhálhdit'oh whe 'unt'oh.

19 Yak'usda didut 'udechoo nek'entsi' 'et huwa ook'ets'intsi'.

Be 'alha 'uhoont'oh-i, 'i be Yak'usda ook'une' ts'oot'en

20 'Ilhoghun dune Yak'usda ook'esi' ni de, 'ink'ez dudulhutsin ts'u dutni, 'en whuts'it-un 'unt'oh. Nts'en'a dudulhutsin yunilh'en hoontsi' yuk'elhítsi' de, Yak'usda 'aw lhuyis'en, 'ink'ez nts'en'a 'en yuk'etitsi'?

21 'Ink'ez ndi khuni netl'a ídan'ai-i, ndiz un'a njan dúhoont'oh; mbe Yak'usda yuk'e ntsi'-un, dudulhutsin cha k'eootsi' huba' hoont'oh.

5 ¹ Ts'iyanne Sizi, 'en Gri 'unt'oh, ooba 'alha 'uhoont'oh-un, 'en Yak'usda yé ulhtus-i be whuzdli-un 'unt'oh. Mbene la ndun 'ilhiz be ts'ukhutinah-un negha ónin'ai-un, hik'e ntsi' de, mbene la 'en be yé ulhtus-i whuzdline, 'enne cha buk'e hootsi' huba' hoont'oh.

² Yak'usda ook'ets'intsi' 'ink'ez ooghuni ts'oontun de, 'et njan 'et huwa t'ets'oninzun Yak'usda buzkeh buk'ets'intsi'.

³ Ooghuni ts'oontun de, 'et whuz un'a Yak'usda ook'ets'intsi'.

'Ink'ez ndi ooghuni 'aw oogha l'húhoolna' whe ook'une' ts'oot'en.

⁴ Mbene Yak'usda yé ulhtus-i be whuzdline, 'enne ndi yun k'ut 'ut'en ntsi'-i ch'a' nilhde. Bé neba 'alha 'uhoont'oh-i, 'i be whuch'a' nilhde.

⁵ Ndun Sizi 'en Yak'usda ooYe' unli ooba 'alha 'uhoont'oh-un, 'en ndi yun k'ut 'ut'en ntsi'-i ch'a' 'ulhdeh.

Yak'usda duYe' dant'oh-un 'unt'oh whunénulhtun

⁶ Sizi 'en Gri 'unt'oh. 'En too 'ink'ez 'uskai' be whusainya. 'Aw too be za iloh. Too 'ink'ez buzkai' be whusainya. Ndoni ts'ih'un be' hoont'oh-i 'unt'oh. 'Et huwa 'en 'uja oonalh 'óohooja.

⁷ 'Et tane 'enne yak'uz whuts'un bunalh 'óohooja. NeBá, 'ink'ez ndun khuni cha, 'ink'ez Ndoni cha. Ndunne tane 'ilhoghun za hinli.

⁸ 'Et tane 'enne ndi yun k'ut bunalh 'uhooja. Ndoni 'ink'ez too 'ink'ez buzkai' cha. Ndi tane 'i l'ghá 'uhudija.

⁹ Dune oonalh 'óohoojane bughuni ts'ilhchoot de, Yak'usda oonalh 'óohooja-un 'on nus hooncha whe' hoont'oh, 'ink'ez ndi Yak'usda duYe' yughu yailhduk-i, 'i 'unt'oh.

¹⁰ Mbe Yak'usda ooYe' ooba 'alha' yint'oh-un, Yak'usda daja ni-un, ooba 'alha 'uhoont'oh whuzdli'. Mbe Yak'usda ooba 'alha' lhe'yit'oh-un, 'en Yak'usda whuts'it ninzun. Yak'usda duYe' yughu yailhduk-un ooba 'alha' lhe'yít'oh 'et huwa.

¹¹ Ndi oonalh 'óohooja-i, 'i Yak'usda 'ilhiz ts'ukhutinalh-un negha óonin'ai. Ndi 'ilhiz be ts'úkhuna-i, 'i ooYe' bulh 'únt'oh.

¹² Mbe ooYe' 'ut'i-un 'ilhiz be ts'ukhuna-i 'ut'i whe 'unt'oh. Mbe la Yak'usda ooYe' lhit'ih-un, 'en 'aw 'ilhiz be ts'ukhuna-i lhit'ih whe 'unt'oh.

¹³ Mbene Yak'usda ooYe' boozii' ooba 'alha' yint'ohne ndowhi nohts'ó k'eguz. 'Et whe la 'ilhiz khutihnalh-un whaht'i t'eeonóhzin, 'ink'ez Yak'usda ooYe' boozii' nohba 'alha' oot'e' za oot'e'.

Yak'usda uniyalhne, 'enne ndet oots'o hukwa' hutni-un, ts'iyawh ubudits'o

¹⁴ 'Et whelhts'uniljut whe oots'un tezdudli, 'et 'i 'unt'oh, ndet hoonli oots'u hukwa' ts'utni de, hukwa' ninzun de, nedits'o.

¹⁵ 'Ink'ez nedits'o t'ets'oninzun de, ndet oots'o húkwa' ts'utni, ndi whutsoda' oots'u húkwa' ts'utni-un, 'et nawh lhe'hoot'oh negha t'ikulh.

¹⁶ Mbe la bulhutsin lubeshi 'aw yuk'é dalhtisah-i 'ulh'en, yunilh'en de, Yak'usda yoodolhkut 'ink'ez nyoon lubeshi 'aw yuk'é dalhtisah

'ulh'en-un, 'en khutinalh-un yugha óota'alh. 'Et lubeshi ooghá daztitsah-i cha hoonli. 'Aw 'et huba tenadondli lhduzúsní.

17 Ts'ih'un be nulhe'ts'ust'en-i, 'i ts'iyawh lubeshi 'unt'oh.

'Ink'ez lubeshi ooghá dalhtitsah-i, 'i cha hoonli.

Mbe la Yak'usda yé ulhtus-i gha whuzdli-un, 'aw lubeshi lhe'ulh'en

18 Mbe Yak'usda yé ulhtus-i gha whuzdli-un, 'aw lubeshi lhe'ulh'en, 'et t'ets'oninzun. 'Et hoonts'i mbe la Yak'usda yé ulhtus-i gha whuzdli-un didutch'oh khudli whe 'unt'oh, 'ink'ez ntsi'-un 'aw yut'aóonalh ait'oh.

19 Wheni Yak'usda bulh 'úts'int'oh t'ets'oninzun. 'Ink'ez ndi yun k'ut whut'enne, ntsi'-un ts'iyawh k'úne' bul'en.

20 Yak'usda ooYe' whusainya 'ink'ez t'ets'onínzun njan t'ets'onózin-un, 'et negha óonin'ai. 'Et whe ndun 'alha' 'unt'oh-un t'eznoozeh ha.

Ndun 'alha' 'unt'oh-un, 'en bulh 'uts'int'oh. OoYe' Sizi Gri 'en bulh 'uts'int'oh. Ndun 'en 'unt'oh soo 'alha' Yak'usda 'unt'oh 'ink'ez 'ilhiz be ts'úkhuna-i unli whe 'unt'oh.

21 Ts'oodunneyaz 'uk'eltsi-i ooch'a khahdli. 'Et ndo honeh.